

分五祠學
野行祀校

畧

卷
40-42

新學
外學
PDG

貴陽府志卷四十

知貴陽府事泰和周作楫並嚴幹

知貴陽府事博白朱德璉綬堂刊

畧一

分野畧第一

談天文於一郡之中分野其爲要最乎顧有分野卽有分野之所起又有分星之同類極高及偏度可以測晝夜之短永晷景之進退中節之早晚晨昏之先後又可以驗日食之分抄其數眇矣其於地也則又可以定廣輪奠山川規城邑審民居而辨氣候焉先

王之建國也。必南視星。北準極。以正朝夕。皆用是也。由是而分星之說起。由是而北斗三台五緯干支之分。亦莫不聯類而起。則又以審天地之合。而知盛衰進退之幾者也。今采摭其說。作分野畧。

極高偏西度。分星。

雜分野。

氣候。

夫善言地者。必合於天。地之合於天者。惟北極高度。東西偏度爲最著。周官經曰。以土圭之法。測土深。正日景。以求地中。日南則景短多暑。日北則景長多寒。日東則景夕多風。日西則景朝多雨。日至之景。日有

五寸謂之地中天地之所合也四時之所交也風雨之所會也陰陽之所和也然則百物阜安乃建王國焉制其畿方千里而封樹之凡建邦國以土圭測其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者四之一記曰匠人建國水地以縣置槷以縣眡以景爲規識日出之景與日入之景晝參諸日中之景夜考之極星以正朝夕測土深景短景長卽北極高度也

正日景者謂由月食之頃於南北同度東西不同度之地同時識中星起漏刻各推至次日日中景正午之時驗其刻漏之多寡以知天之正午故曰正日景也於是轉以刻漏折度以定東西相距度故正日景卽定東西也旣以測土深之灋知海內南北大距又以正日景之法知海內東西大距就南北東西之中而折算卽求得海內之地中所云崑崙地之中也海內之地當北極之南赤道之北故近日而南者景短多暑遠日而北者景長多寒崑崙正直天之午位故其地日中卽是天之正午直之而東者日出早當天

正午之時彼之日已過中故其景夕也直之而西者
日出晏常天正午之時彼之日未及中故其景朝也
海內之四極南暑而北寒東風而西雨故景朝多風
而景夕多雨此總論海內也海內有九土禹貢九州
於九土爲一土實東南神州農土也故崑崙在中國
之西北每土又各有地中亦有四極以生風雨寒暑
又以測土深之法定南北之大距亦折算以求一土
之地中乃得五行陽城洛陽之間爲中國之地中其
地當午中夏至之時土圭景長尺有五寸於是建王
國焉一土之地中亦曰土中故書曰宅土中叅諸日

中之景卽測景之短長也攷諸極卽測北極也

今時測北

極高下者歲由日景轉算求沉括有直測北極術

攷諸星卽測中星也正朝

夕天之之定卯酉也既有定卯酉轉以日景中星攷之卽知偏度矣知定卯酉之法顯則由月食起漏隱則以氣驗之焉詩曰定之方中作於楚宮揆之以日作於楚室又曰旣景廼岡卽土圭匠人之法云故土深景短長之說卽今之北極高度正日景景朝夕卽今之偏度及日出入時刻也是則周官之法上自王圻下至百里之國皆以上圭測之無不有極高及偏西度蓋亦如今揣籥小錄之所載縣有極高及偏度

矣明崇禎初西洋人以輿圖推得貴州北極出地二十四度偏西九度半見明史天文志而五禮通考云貴州北極出地二十六度三十分二十秒偏西九度五十二分四十秒揣審小錄貴筑縣北極出地二十六度三十一分偏西九度五十二分定番北極出地二十六度五十分四十秒偏西十度廣順北極出地二十六度八分偏西十度十三分開州北極出地二十六度五十九分三十秒偏西九度四十七分龍里北極出地二十六度二十四分偏西九度三十七分貴定北極出地二十六度三十分二十秒偏西九度二十

一分修文北極出地二十六度四十四分二十秒偏
西九度五十分則實測之數也偏西者據順天爲言
凡偏一度於時差四分貴州視順天凡節氣皆早二
刻九分半云凡言貴州者卽據貴陽府城爲言此則
貴陽極高偏度之涯畧也

分星之說以周天十二次二十八星分繫乎九州之
邦國以占祿祥攷得失者也原出於周官左傳詩緯
淮南子其說古矣難者乃曰禹貢九州之地北屬流
沙西至黑水東南盡海於四海之內特一隅耳以地
圖之說攷之海內又地圖之一隅也天之經星盡乎

天度而以分繫一隅之一隅於理似偏故分星之說雖出於周官左傳不能無疑焉然實無可疑也蓋分星卽土中之說所推耳九州固地圓一隅之一隅然旣成爲一隅則猶宮之有室田之有區其畛域固固然也則畛域之中自有至中之地有至中之地自有環繞於外之地其環繞於外者爲四爲八爲十二爲二十八又其自然之勢也四岳而旣配四象矣則十二國依方環列而以配十二次胡爲其不可也故曰分星卽土中之說所推耳難者曰中國本大地一隅卽可以配十二次而中國之外又何說以處之曰海

內有九土土有一中環其土中各可配十二次焉又
何患無說以處之地圖之內復有如海內者其處之
亦猶是矣漢書藝文志有海中二十八宿國分臣分
安知非其說也然而有可疑者非在是也乃吳越
魯燕之錯亂耳保章氏職云以星土辨九州之地所
封封域皆有分星以觀妖祥鄭康成注曰九州州中
諸國中之封域於星亦有分焉其書亡矣堪輿雖有
郡國所入度非古數也今其存可言者十二次之分
左氏春秋傳曰有星出於婺女裨竈曰今茲歲在顓
頊之虛姜氏任氏實守其地居其維首而有妖星焉

告邑姜也顓頊之墟虛也姜氏蓋謂齊任氏蓋謂章
泉二國又曰衛顓頊之墟也故爲帝邱其星爲大水
大水室也又曰昔高辛氏有二子長曰閼伯季曰實
沈居於曠林不相能也后帝不臧遷閼伯於商邱主
辰商人是因故辰爲商星遷實沈於大夏主參唐人
是因以服事夏商及成王滅唐而封大叔焉故參爲
晉星又曰歲棄其次而旅於明年之次以害鳥帑周
楚惡之鳥帑鵲尾也又曰龍宋鄭之星也龍蒼龍體
也由是而言則分星之說元稹虛危爲齊訾陬營室
東壁爲衛實沈觜嚙參爲晉鵲火柳七星爲周鵲尾

翼軫爲楚壽星角亢爲鄭大辰房心爲宋於傳皆有
明文可無疑矣而大梁昴畢爲趙以類而推當亦不
差惟星紀斗牛女淮南子以爲越吳降婁奎婁淮南
子以爲魯析木尾箕淮南子以爲燕於地之方位殊
爲錯出孔穎達亦嘗致疑焉賈公彥又遷就爲受封
之月歲星所在之說其實非也蓋維首卽星紀有妖
星在維首而曰告邑姜邑姜齊女則維首亦爲齊分
可知就傳意而繹之知斗牛女不爲越吳分野明矣
詩推度云唐天宿奎婁則奎婁又不得爲魯也又曰
酈天漢之宿注曰天津也漢書云文帝後七年九月

有星孛於西方其本直尾箕末指虛危長丈餘及天
漢十六日不見劉向以爲尾宋地今楚彭越也箕爲
燕又爲吳越齊宿在漢中負海之國水澤地也是時
景帝新立信用鼂錯將誅正諸侯王其象先見後三
年吳楚四齊與趙七國舉兵反鄒在衛南近南燕彭
城在宋東南則尾箕之宿實當宋魯之間其所云燕
蓋南燕而非北燕若北燕則史記有云齊燕之疆占
虛危此又見析木非北燕審矣由是以推則淮南子

魯台路之假借而吳爲魯之假借

山海經云雷澤在吳西攷雷澤

實在魯西則吳乃魯之假借字明矣

越則近魯之地

桓元年公及鄭是伯盟于越是也

則越吳魯燕非揚州徐州幽州也其以爲揚徐幽者
實出於元命包而史記有之劉歆三統歷用之其說
又以竇參爲益州東漢時張衡已疑益州之說不古
則元命包之說蓋歆所矯造而史記之文又歆追改
耳不然胡爲一篇之中旣云析木幽州又云齊燕之
疆占虛危邪歆作三統歷損夏年以益周東漢時陳
思已駁之又奚有於十二次焉康成注周禮仍用淮
南說躔矣然而後世用歆之說者實繁其於辨柯一
郡尤多異說晉書天文志云魏大史令陳卓言郡國
所入宿度范蠡鬼谷先生張良諸葛亮譙周京房張

衡並云蜀郡入參一度犍爲入參三度牂柯入參五
度巴郡入參八度隋書地理志云梁州於天官上應
參之宿牂柯屬梁州其說一漢書地理志云秦地於
天官東井與鬼之分野也其界自宏農故關以西西
南有巴蜀廣漢犍爲武都又西南有牂柯越巂益州
皆宜屬焉華陽國志云牂柯郡上值天井故多水潦
唐書天文志云東井據百川上流故鶉首爲秦蜀墟
得兩戒山河之首又云東井與鬼鶉首也初東井十
二度餘二千一百七十二秒終柳六度自漢三輔及
北地上郡安定隴西自隴坻至河右西南盡巴蜀漢

中之地及西南夷犍爲越巂益州郡極南河之表東
至牂柯地理志云劔南道蓋古梁州之域漢蜀郡廣
漢犍爲越巂益州牂柯巴郡之地總爲鶡首此以牂
柯爲鶡首之次其說二明史天文志云載洪武十七
年大明清類分野書成其書載井九度至柳三度鶡
首之次四川布政司所屬惟綿州背分合州參井分
餘皆井鬼分時貴州宣慰司屬四川則井鬼分也明
沈思充貴州志云貴陽府貴州宣慰司定番州貴州
前衛龍里新添等衛俱井鬼之餘此蓋用漢書之說
明一統志云貴州宣慰司參井之餘謝東山貴州志